

ՌԴ Ե ՀԱՅԸ 4. ՕՇԱԿԱՆԻ՝ «ԾԱԿ ՊՏՈՒԿԸ» ՎԵՊԸ

Հարկ է ասել, որ Օշականի վեպերի ստեղծման մեջ, էական դեր են խաղացել ռուս գրականության հսկաները՝ Տոլստոյը եւ Դոստոևսկին, որոնց գործերին ծանոթանալուց հետո է, որ նրան այլեւս ոչ միայն չեն հետաքրքրել փոքր ծավալի գործերը՝ պատմվածքներն ու վիպակները, այլ նաեւ չեն բավարարել այն ասելիքներն ու հարցադրումները, այն ոճը, այն մեթոդը, որով մինչ այդ ստեղծագործել է ինքը: Եվ 25 տարվա անդուլ ինքնաշխատությունից, հոկումից, հասունացումից հետո միայն կրկին գրիչ է վերցրել իր վեպերը ստեղծելու համար: Ինչո՞ւ հատկապես վեպ: Ժանրն իր տարողությամբ, խորությամբ, դեպքերի, տիպարների բազմազանությամբ ու հոգեբանական պեղումներով, հնարավորություն էր տալիս գրողին ամբողջ խորությամբ ու ծավալով բացվելու: Ինքնաձանաչման այն տարիները ձեւավորել, կերպարանավորել, բացել էին նրա գրական շտեմարանը, նրա ամբողջ, բայց հարուստ զգացումներին ու երեւակայությանը որոշակի ուղղություն ու ձեւ տվել, սրել նրա ստեղծագործական անհատականությունը: Իր կենսագրության մեջ ուշադրության արժանի այս երեւույթը, որը իր կարգապահ, սխտեմատիկ, մտածված աշխատանքով է առաջնորդվել, կազմավորել է իր մտածումներն ու սկզբունքները, հայտնաբերել իր ուղղությունն ու ոճը: Նա իր վիպային մոտեցում ոչ միայն սկիզբը դրեց իր վեպերի, այլ նաեւ արեւմտահայ վիպագրությանը առաջնորդեց դեպի նոր ուղղությունը: Համաշխարհային գրականության մեջ դժվար թե հանդիպենք այս ճանապարհով իր վիպային արժեքները ստեղծած մեկ այլ վիպասանի:

Ինչպես ինքն է բնորոշում՝ «վէպը իրմով շրջան կը փոխէ, այսինքն՝ կը փորձէ նոր՝ յանդուգն ճարտարապետութիւն մը, եթէ ոչ աշխարհի գրականութեան, գէթ հայ գրականութեան վրայ»¹:

Ո՞րն էր այդ փոփոխությունը, այդ հանդուգն ճարտարապետությունը: Առաջին հերթին իր գրական մտածողությունը: «Գիրքերու պատմութիւնները ինձի համար գրականութեան չեն պատկանիր, այլ՝ կեանքին պատմութիւններն են»²: Ուրեմն գրողը իրական կյանքի պատմությունները գրականություն փոխանցողն է:

1 «Համապատկեր», էջ 218:

2 «Համապատկեր», հ. 10:

Իսկ ո՞վ է վիպողը իր հասկացողությամբ: «Վիպողը միայն հաճելի ընթերցումներ մատակարարող մունետիկ մը չէ»¹, - հայտարարում է նա: Պարզ է, որ նա դեմ է իր վեպերը հասարակության ճաշակին հարմարեցնելուն: «Կեանքը կապրինք կամ զայն կը տանինք, կը փոխադրենք կեանքէն վեր տարածութեան մը վրայ»²: Այդ «կեանքեն վեր տարածությունը» անշուշտ գրականությունն էր եւ իր ձգտումը՝ գրական միջոցներով կյանքի իրական վերարտադրությունը՝ արվեստի փոխակերպելը:

Իր ստեղծագործական մեթոդով նա փոխեց վեպի կերտման ընդունված, քարացած հասկացողությունը: Ընդհանուրի մեջ անհատի վիճակը դարձրեց կենտրոնական, տեսանելի, շոշափելի եւ մարդկային ներաշխարհը դարձրեց իր վիպական կտավը: Այդ կտավի վրա տարածեց մեզմիջ խլված մեր քաղաքների, գյուղերի ու գավառների ապրված, անհետացած, բայց մեր մեջ իր դրոշմը անջնջելիորեն թողած կյանքը: Այդ կյանքը նա իմաստավորեց բարքերով, ավանդույթներով, այնտեղ ապրող մարդկանց խոհերով, ձակատագրերով, լավ ու վատ հարաբերություններով, սերերով, տարփանքներով, վրեժխնդրությամբ, ինքնազոհ հերոսություններով: Այդ հարաբերություններում լուծեց ձակատագրի, կյանքի ու մահվան, լինելիության ու շարունակություն ստեղծելու համամարդկային խնդիրներ:

Ահա այս արժեքների վրա հիմնված իր վեպերից «Ծակ Պտուկը», «Հաճի Մուրատ», «Հաճի Ապտուլլահ»-ը ժամանակագրական առումով գրված են իրարահաջորդ հերթականությամբ, անմիջապես հրատարակվելով 1928-1934 թթ. Բոստոնի «Հայրենիք» ամսագրի եւ Կահիրեի «Հուսաբեր» օրաթերթի քսանհինգ համարներում: 1973 թ. Բեյրութում այս երեք վեպերը հավաքագրվել են մեկ գրքի մեջ եւ երկու անգամ հրատարակվել «Երկեր» խորագրի տակ: Հեղինակի ձեռագիրը չգտնվելու պատճառով գրքի հրատարակիչները հիմնվել են թերթերի այդ հրատարակությունների վրա: Տվյալ ուսումնասիրությունը հիմնվում է Բեյրութի 1973 թ. Անթիլիասի այդ հրատարակության վրա:

Այս վեպերից յուրաքանչյուրը թեեւ կյանքի տարբեր երեւույթներն են բացահայտում, բայց բոլորն էլ հիմնված են մի հիմնական փիլիսոփայության՝ կյանքի հավերժական պայքարի, ապրելու եւ գոյատևելու, մեռնելու, սերունդ ստեղծելու հավերժական երեւույթի վրա, մարդու էության ու նրա ապրումների, նրա թուլությունների ու խիզախումների վրա: Այնտեղ մենք տեսնում ենք կեցության անհավատալի պայքար անձնական, հասարակական, մարդկային եւ ազգային պատմական իրադարձություններում: Անհատի բախումը բարքերին, ազգային ինքնությունը շարունակելու պայքար, ցեղի խորհուրդ, ազգային ավանդույթ, հայի մարդկային եւ ազգային իրա-

1 «Համապատկեր», հ. 10, էջ 95:

2 «Համապատկեր», հ. 10:

վունքների ուսնահարում, թուրքի դեմ պայքարի սկզբնավորում:

Օշականի բոլոր գործերը կյանքի իրական պատկերը լինելուց զատ, հիմնված են նաեւ իրական եղելությունների, դեպքերի վրա, որոնց ինքն ականատես է եղել կամ լսել ուրիշներից: Հիշյալ երեք՝ «Ծակ Պտուկը», «Հաճի Մուրատ», «Հաճի Ապտուլլահ» վեպերը նույնպես իրական դեպքերի վրա ստեղծված գործեր են, որոնք իր գրչի զորությամբ նոր իմաստ ու շունչ են ստացել:

«Միջավայրի ու տիպերի հնարավորին չափ իրական պատկերման հակումը շաղախվում է նրանց հոգեկան աշխարհի ներքին անտեսանելի շարժումների, ենթագիտակցական մղումների մանրամասներին, նրանց արարքների բնախոսական պատճառաբանությամբ», - գրել է հայրենի գրականագետ Ս. Թոփչյանը նրա ստեղծագործությունների մասին¹:

Եվ իրապես այդ շաղախով է ստեղծված իր «Ծակ Պտուկը» վեպը: Վեպի 320 էջերը, որոնք ընդամենը երեք ամսում են գրված, ոչ միայն մեր ծեռքից խլված, մեր գավառներից մեկի բարքերի, ազգային մեր կորած հարստությունների փրկության ծիգ է, այլ պատում է մեր ժողովրդի ոգեղեն պաշարներով հագեցված մի ամբողջ իրականության, հավիտենության ձգտումով ծնված մարդկային փոխհարաբերությունների, նրանց մերձեցման ու նրանց էության մեջ տեղադրված արժեքների եւ նաեւ նրանց արատների մասին: Ուսումնասիրենք այդ վեպերը առանձին-առանձին:

«Ծակ Պտուկը» վեպի գործողությունը Պրուսայի տարածքում գտնվող Նիկիո լճի շրջանի զուտ հայաբնակ գյուղերից մեկում է տեղի ունենում: Այդ ժամանակ մեր գյուղերն ու գավառները դեռ անուն իսկ չեն ունեցել: Մարդիկ ապրել են բնական փոխհարաբերությամբ, մինչեւ իսկ հասարակարգային դասակարգայնությունը՝ հարուստի եւ աղքատի բաժանումը, դեռ հաստատված չէ, դա դեռ զուտ հարաբերական հասկացողություն է եւ դեռ հայ գյուղերը հայաբնակ են: Թուրքը նոր էր սկսում իր ունեցումները այնտեղ:

Բնութագրելով «Ծակ Պտուկը» վեպի կենսատարածքը՝ Կ. Աղաբեկյանը գրում է, որ դա «պատմական Բյուզանդիայի Նիկիո լճի շրջանի գյուղաշխարհն է, նշանավոր դեռեւս 325 թվին տեղի ունեցած եկեղեցական ժողովով, որտեղ հարատեսել են հիշողությունները առաջին առաքյալների, հին հավատացյալների, հավատքին շուլալված հրաշագործությունների մասին, հաստատվել են մարդկային ու կրոնական հարաբերություններ, ձեւավորվել եւ նաեւ ձեւախեղվել են սովորություններ ու բարքեր, արմատավորվել կեցության ու կացության մշակույթ»²:

Թուրքաբնակ գյուղերի արանքում գոյատևող այս հայ գյուղը ապրում է համայնքային կյանքով ու մտածելակերպով, հնուց իրենց հասած բարքերով:

1 «Գրական թերթ», 1981, թիվ 27:

2 Կ. Աղաբեկյան, Հակոբ Օշական, էջ 94:

Ամբողջ գյուղով նրանք հավասարապես կիսում են իրար ուրախություն, վիշտ, օգնության հասնում իրար, միասին պաշտպանում գյուղը թուրքերից, եթե մեկը ավանդույթ է ունակոխում, ամբողջ գյուղն է դատապարտում նրան, եթե թուրքն է հարձակվում՝ կրկին ամբողջ գյուղով են պաշտպանվում: Սակայն այս միակամության մեջ, այս պարզ տեղանքում ապրող մարդիկ իրենց հոգում կրում են բարդ, խճճված մի աշխարհ, տառապանքով ու վշտով ծանրաբեռ, որն անըմբռնելի եւ անտեսանելի է մյուսին, կողքինին, հարեւանին:

Վեպի բովանդակությունը հետեւյալն է: Գյուղի հիմնադիրներից Հայրապենց գերդաստանի Հաճի Ստեփանի ընտանիքն է վեպի կենտրոնում: Ծխախոտի մաքսանենգությամբ ապրող քաջ ու գեղեցիկ այս մարդուն գյուղում հաճախ են տեսնում հարբած, թուրք կանանց կամ տղամարդու հագուստով երիտասարդ պոռնիկների (Օշականի օգտագործած բառն է) իր տուն առաջնորդելիս: Թեեւ իր անբարո վարքը դատապարտելի է գյուղացիների համար, բայց գյուղը վախից լռությամբ հանդուրժում է, գիտենալով նրա կապերը թուրք կառավարության ու ոստիկանության հետ: Մյուս կողմից՝ նրա խիզախության եւ կապերի շնորհիվ է, որ գյուղը գերծ է մնում թուրքերի ասպատակություններից: Այս խիզախ, իր անվրեպ գնդակի փառքով հայտնի, «երբեք կնիկի անուն» չտվող մարդը երկունքի գիշերը խեղդամահ է անում իր կնոջը՝ գեղեցկուհի Նազիկին, չներելով նրա դավաճանությունը մի երիտասարդի հետ: Բայց փրկվում է նրա ծնած աղջիկը, որին կոչում են մոր անունով՝ Նազիկ: Իր մոր պես գրավիչ, մոր զգլխիչ գեղեցկությամբ օժտված Նազիկը մեծանում է իր անսիրտ մեծ մոր՝ Հաճի Խաթունի խնամքի տակ, որը իր հարսի հանդեպ ունեցած ողջ ատելությունը թափում է որբ թոռան՝ Նազիկի գլխին: Մայրական սիրուց ու զգվանքից զրկված Նազիկը հասունանում է հորը հագվադեպ տեսնելով տանը, ինքն իր մեջ ամփոփված, մխթարություն գտնելով իրեն տարեկից, իրենց բարի հարեւանի թոքախտավոր տղայի՝ Թումասիկի, ընկերության մեջ: Արթունքի շեմին մոր ոտք դրած Նազիկը, կարեկցանքից դրդված, առանց գիտակցելու կենակցում է Թումասիկի հետ: Հայրը եւ մեծ մայրը անտեղյակ այդ կենակցումից, ամուսնացնում են նրան գյուղի համեստ ընտանիքից, քաջի համբավ ու հարգանք վայելող գյուղի երիտասարդներից՝ Չաքարենց Չաքարի հետ: Ընդունված բարքերի համաձայն Չաքարը մինչեւ հարսանիքը ոտք չի դնում իր նշանածի՝ Նազիկի տունը եւ նրանք իրար հետ չեն տեսակցում մինչեւ հարսանիքի գիշերը:

Չմռան ձյունոտ ու ցուրտ հարսանիքի գիշերը, հարսանքավորների մեկնումից հետո, երբ հարսն ու փեսան առանձնացնում են իրենց ամուսնական առագաստում, բացահայտվում է, որ Նազիկը կույս չէ, «ծակ պտուկ» է: Այդ ժամանակ այդպես են անվանել ամուսնության առագաստին անաղարտ, կույս չհասած աղջիկներին: Դա սոսկ անվանում չի եղել, այլ՝ դաժան ծակա-

տագիր այդ անունը կրողների համար: Նույն այդ բարքերի պարտադրանքով աղջկա կույս չլինելը բացահայտվելուց հետո փեսան պարտադրված է եղել իր տանը չպահելու, ամմիջապես դուրս վճռելու անպատիվ աղջկան: Դա հայ ավանդապահ գյուղի հնուց եկած օրենք դարձած սովորույթներից է եղել, անգուրթ մի օրենք, որը ի վերջո ինքնասպանության է մղել այդ անունը ստացածներին: Խստաբարո գյուղը մերժել է ընդունել նրանց: «Ծակ-պտուկները չէին ապրեր», այդպես էր գյուղի օրենքը:

Եվ Չաքարը խաբված, քաջի իր արժանապատվությամբ խստագույնս վիրավորված, կես գիշերին, առանց ժամանակ կորցնելու, փողոց է նետում Նազիկին: Նազիկը վախենալով իր հորից, որի անսիրտ դաժանությունը ոչ միայն իրեն էր հայտնի, այլ նաեւ գյուղին, գերադասում է պատսպարվել իրենց բարի հարեւաններից Օվակենց Օվակի տանը: Այդ պատահական ընտրությունը դառնում է Նազիկի դժբախտության բացահայտման բանալին: Նույն գիշերն ա խոստովանում է, որ իր կուսությունը վերցրել է Օվակենց Թումասիկը, այսինքն այդ տան թոքախտով հիվանդ միակ տղան, որն արդեն մի քանի ամիս առաջ մահացել էր: Դեռ ավելին, պարզվում է, որ Նազիկը երեք ամսական հղի է Թումասիկի ժառանգով:

Բարի տանտիրուհին, Թումասիկի մայրը՝ Օվակենց Հեղման, մեծ երջանկությամբ է ընդունում Նազիկի համար դժբախտություն դարձած այդ լուրը: Իր որդու՝ Թումասիկի, կորուստի ցավը մեղմող միակ ուրախությունը պիտի լիներ ամշուշտ նրա զավակը, որը կյանք էր առնում դժբախտացած Նազիկի արգանդում:

Սակայն Նազիկի մեծ մոր՝ Հաժի Խաթունի համար այն իրողությունը, որ իր թոռը մինչեւ ամուսնություն, թաքուն կենակցել է, ծակ պտուկ է, անընդունելի ու բարձրագույն անպատվություն է, հետեւաբար պետք է ամեն գնով մաքրել մեղքի հետքերը: Բոլորից թաքուն, երեք ամսական հղի իր թոռանը՝ Նազիկին, գիշերով, գյուղի դայակի հետ, առաջնորդում է գյուղից դուրս գտնվող ջրաղացը, ուր ամենամախմակա միջոցով վիժեցնում են նրա հղիությունը:

Նազիկի հայրը՝ Հաժի Ստեփանը, Չաքարի կողմից կես գիշերին իր աղջկան տանից դուրս վճռելը իր դեմ մեծ անպատվություն համարելով, վրեժով է լցվում Չաքարի դեմ եւ որոշում վրեժ լուծել, սպանել նրան: Չաքարը Հաժի Ստեփանի հետապնդումներից խուսափելով ապաստանում է մոտակա լեռներում:

Նազիկի համար սկսվում է անտանելի մի ծանր կյանք: Մի կողմից համատարած արհամարհանք եւ տանը, եւ գյուղում, անվերջանալի վիրավորանքներով լեցված օրեր, մյուս կողմից՝ հարսանիքի դժբախտ գիշերը Չաքարի հետ անկողնում ունեցած հպումից, նրա գրկախառնումից իր մեջ ծնված անբացատրելի սեր ու ձգտում իրեն վճռած Չաքարի հանդեպ: Հարսանիքի գիշերը

Ձաքարը նրա մեջ առաջին անգամ արթնացրել էր կնոջը, կիրքն ու սերը, ու նա այդ գիշեր հասկացել էր, որ հյուսնված թունասիկին նա կարեկցանքից է հանձնվել: Ձաքարից մերժված, անպատվված ու հեռու, նա ավելի սուր է զգում նրա հանդեպ արթնացած իր զգացումները եւ ձգտում մեկ անգամ էլ հայտնվել նրա թևերի մեջ, մեկ անգամ էլ ըմբռնվել նրա առնականությունը:

Մինչ Նազիկը իր այս ապրումների հետ է, Հաժի Խաթունին հաջողվում է գյուղում ունեցած իր իշխանությամբ շրջանցել ծակ պտուկներին սահմանված ծակատագիրը եւ իր թոռանը՝ Նազիկին, երկրորդ անգամ ամուսնացնում է գյուղի հարգված հարուստ ընտանիքից՝ Կարմիրենց Սահակի հետ:

Կարմիրենց Սահակը, որը հազիվ երկու տարվա ամուսնացած կորցրել էր կնոջը, տարվում է Նազիկի գեղեցկությամբ եւ ամուսնանում նրա հետ, անտեսելով հասարակության աչքին նրա վարկաբեկված վիճակը:

Մինչ Նազիկը փորձում է համակերպվել իր նոր ծակատագրին՝ Սահակի հետ ամուսնությանը, նրա հորը՝ Հաժի Ստեփանին, լեռներից գյուղ են բերում մահացու վիրավորված, որը մի քանի օր հետո մահանում է: Գյուղացիները այդ սպանությունը վերագրում են Ձաքարին: Հաժիի անակնկալ մահը Ձաքարի հանդեպ վրեժի մի նոր ալիք է բարձրացնում Հայրապենց գերդաստանում: Այդ շրջանում նոր էին սկսվել հայ-թուրքական բախումները: Հեռավոր շրջաններից գյուղ էին թափանցում հայերի դեմ թուրքերի գործած վայրագությունների լուրերը: Որեւէ աննշան մեղադրանքով թուրք ոստիկանները տակն ու վրա էին անում գյուղը, բանտարկում կամ սպանում քաջ համբավի տեր երիտասարդներին: Ձաքարը որպես նշանավոր քաջ դառնում է թուրք ոստիկանության հետապնդումների ցուցակում առաջիններից, ուստի եւ գյուղ չի կարողանում վերադառնալ, շարունակում է ապրել լեռներում:

Պարզվում է, ամուսնության գիշերը Նազիկի հետ ունեցած մերժեցումը Ձաքարի մեջ էլ անմարելի կրակ է վառել: Այդ կարծ գրկախառնումից նրա մեջ էլ ծնունդ է առել զգացումների մի ամբողջ աշխարհ, իր մարմնի, իր հոգու, իր էության բոլոր բջիջները լեցվել են Նազիկով: Նա զղջում է Նազիկի հետ այդքան անմարդկային վարվելու համար: Լեռան առանձնության, իրեն շրջապատող վտանգի մեջ իր միտքն ու հոգին հանգիստ չեն տալիս իրեն եւ մոռանալով ամեն զգուշություն՝ թուրքի եւ Հայրապենց գերդաստանի հետապնդում, գիշերները լեռից իջնում է գյուղ Նազիկին տեսնելու հույսով: Մինչ այդ, Նազիկի ամուսինը՝ Սահակը հիվանդանում է, նույն անհայտ, մահացու հիվանդությամբ, որը գերեզման էր իջեցրել իր եղբայրներին: Ընտանիքը փորձում է ամեն կերպ փրկել Սահակին, ընտանիքի միակ շառավղին: Կարմիրենց ընտանեկան այդ տագնապի մեջ Ձաքարին հաջողվում է տեսակցել Նազիկի հետ: Երկուսն էլ իրար հանդեպ նույն անկասելի մղումով բռնկված, արհամարհելով ամեն վտանգ, տեսակցում եւ կենակցում են Կարմիրենց տանը, հիվանդ

պառնկած ամուսնու հարակից սեռյակում: Իրար գրկում նրանք վերանում, մոռանում են իրար պատճառած եւ ցավ, եւ վիրավորանք, եւ դժբախտ կյանք, գյուղի խավարամիտ դաժան օրեմքներ: Նրանք միայն սեր են ըմբռնում ու գիշերային այդ թռուցիկ հանդիպումները վերածում երջանկության, իրենց ծանր, տառապանքով լեցված կյանքին ուժ տվող սնունդի: Այդ գաղտնի, կարծ, ահով լեցված տեսակցությունները շուտով բացահայտվում են: Եվ բացահայտողը՝ Հաճի Խաթունը, շատ չանցած մահանում է: Չաքարը մի կերպ փախչում է հետապնդումից ու քաշվում լեռների խորքը: Ամբողջ հարվածը կրկին ընկնում է Նազիկի անձին: Կրկին գյուղի եւ իր ընտանիքի ողջ ատելությունն ու նվաստացումը թափվում է նրա գլխին: Սահակին քաղաք բուժման տանելու պատրվակի տակ Նազիկին ուղարկում են իր հոր տուն: Հայրապենց գերդաստանի համար Չաքարի տեսակցության հանդգնությունը ավելի է թարմացնում ու բորբոքում նրանից վրեժ լուծելու զգացումը: Չաքարի կենդանի լինելու լուրը հասնում է նաեւ թուրքերին: Ինչպես միշտ, որեւէ հայի ձեռք գցելու համար, նրանք խստացնում են իրենց բռնությունները, գյուղում սկսվում են թուրքական ճնշումներն ու խուզարկումները: Հայրապենց գերդաստանը, ցանկանալով մեծակ մաքրել Չաքարի հաշիվը, թուրքերին խոստանում են իրենց հանձնառու դառնալ նրան հայտնաբերելու եւ թուրքերին հանձնելու գործին:

Համառ հետապնդումներով Հայրապենց տղաները բացահայտում են Չաքարի թաքստոցը եւ գիշերով պատրաստվում բարձրանալու լեռ, նրան սպանելու: Նազիկը լսելով նրանց ծրագրի մասին, նրանցից առաջ, մթնշաղիւն, ծանապարհվում է լեռ, Չաքարին զգուշացնելու, փրկելու նրան մահից:

Նազիկի, այդ լուռ ու մուսջ աղջկա, գիշերային ինքնագոհաբերության մեջ Չաքարը հայտնաբերում է մեկ այլ Նազիկի, որին ինքը երբեք չի ծանաչել ու զնահատել: Նրա սերը էլ ավելի է կրկնապատկվում եւ նա էլ ավելի է զոջում իր վերաբերմունքով նրան այդքան ցավ պատճառելու համար: Սակայն այլեւս շատ ուշ է: Հոգնած շրջապատի դաժան, անմարդկային հալածանքներից, Նազիկը որոշում է մեռնել իր սիրելի էակի՝ Չաքարի մոտ: Սիրահարները պատսպարվում են անտառի խորքում մի ժայռի ներսում: Հայրապենց տղաները գտնում են նրանց հետքերը եւ որոշում են Նազիկին էլ Չաքարի հետ սպանել, նրա թողած արատից իրենց գերդաստանի անունը մաքրել: Սկսվում է ծանր հրացանաձգություն, որի ընթացքում Նազիկը ջունքից վիրավորվում է եւ մահանում Չաքարի թելերի մեջ: Չաքարը չկարողանալով տանել իր սիրած կնոջ մահը, իր սրով մահացու վիրավորում է ինքն իրեն: Հայրապենց վրիժառու խումբը Չաքարին գտնում է մահացու վիրավորված իր սրով, իսկ Նազիկին՝ իրենց գնդակից սպանված: Ժայռախորշում կատարված սարսափելի ողբերգությունը ազդում է Հայրապենց տղաների վրա: Չաքարի քաջությունը այն-

քան է ցնցում նրանց, որ որոշում են թուրքերին չհանձնել նրա վիրավոր մարմինը: Պատգարակի վրա դրած անընկճելի վիրավոր քաջին նրանք հանձնում են նույն անտառի հայ փայտահատների խնամքին՝ թաքցնելով թուրքերից:

Այուժեի այս հանգամանորեն ներկայացումը կարելու է գործի ամբողջական ընկալման համար:

Օշականը վեպը հրամցնում է չորս մասերով, մոտ քսանի հասնող տարբեր հոգեբանական վիճակները իրար օղակող եւ այն զարգացման զագաթնակետին հասցնող պատկերներով: Այդ մասերը ունեն ենթամասեր նաեւ, ինչպես օրինակ՝ թուրք ոստիկանների գրոհը Չաքարին ծերբակալելու համար, նրա տան պաշարումը, Նազիկի պարտադրական վիժումի ամբողջ նկարագրությունը, Հաժի Ստեփանի կամ Հաժի Խաթունի հոգեվարքները եւ այլն, որոնք ինչպես ինքն է նշում՝ «գրուած են խորութեան՝ dimensionին յատուկ ուշադրութեամբ մը»¹:

Ըստ իր խոստովանության վեպը ավելի ընդարձակ պիտի լիներ, «թե՛ հրատարակելի ըլլալու պայմանէն հարկադրուած՝ չսեղմուէր»²: Ուրեմն ստեղծագործական կաշկանդումը առկա է վեպում, իսկ յուրաքանչյուր ստեղծագործող գիտե, թե ինչ է նշանակում թերթում տպագրվելու պահանջներին ենթարկվելը:

Այդ մասերի եւ ենթամասերի հիման վրա իր վեպի կառուցումը նա չի թաքցնում, որ Ստեփանի վեպերի ազդեցությունն է կրում, միայն այն տարբերությամբ, որ դրանք «կը վերածէ լայն կառոյցներու, զանցնելով Սթանտալին սեղմութիւնը»³:

Իր խոստովանությամբ վեպի կառուցման մեջ օգտվել է եվրոպական, իսկ «մտածումի հանդէպ սէրը ժառանգած է ռուս վիպասանէն»⁴: Այդ վիպասանն անշուշտ Դոստոևսկին էր: Այս խոստովանությունը հաստատում է, որ ազդվելով եվրոպականից եւ սիրելով ռուսականը, ստեղծել է իրենը, բայց չի ընդօրինակել նրանց: Որովհետեւ «կաղապարները օգտակար են ամոնց համար, որոնք սահմանված են մինչեւ վերջը աշակերտ մնալու»: Իսկ ինչպես գիտենք, արդեն 25 տարվա ինքնահղկման, ինքնաշխատության ձգնումով նա դուրս էր եկել աշակերտության սահմանից, որը նշանակում էր նաեւ կաղապարների ազատագրում: Այդ 25 տարիներում նա արդեն գտել էր իրենը եւ համարձակորեն վիպային ասպարեզ մտել:

«Ծակ Պտուկը» աչքի է ընկնում կառուցվածքի ինքնատիպ ոճով ու ամրությամբ: Այնպիսի ծարտարապետությամբ է նա իրար հանգուցում դեպքերն ու

1 «Մայրիներու շուքին տակ», էջ 17:

2 Նույն տեղում, էջ 21:

3 «Համապատկեր», հ. 10, էջ 183:

4 Նույն տեղում:

հոգեբանական բարդ անցումները, վիճակները, այնպիսի անակնկալ բավիղներ է մեր դեմ բացում մարդկային նկարագրում, որ տվյալ կառույցի որ մուտքից էլ մտնես, քեզ գտնում ես հիմնական խնդիրների կենտրոնում: Սա էլ օգնում է վեպի գեղարվեստական միասնությանը՝ սյուժեի, կերպարների զարգացմանն ու դեպքերի բախումին, բարքերի ըմբռնումներին, վեպի շարժման կատարյալ համաչափությանը:

Այն տեսակետը, որ իր վեպերով Օշականը միայն փորձում է կորստից փրկել մեր ժողովրդի անցյալ բարքերը, որն հիմնված է մասամբ իր գրության «Մնացորդաց»-ին վերաբերող արտահայտությանը՝ «որ Օշական փրկած է անդարձ կորուստ է իր ժողովուրդին ու ամոր դրացիէն՝ թուրքէն անփոխարինելի բարքի մթերքներ», ոչ միայն սահմանափակում է գնահատել նրա արժեքը, գնահատել նրա անհրաժեշտությունը մեր ըմբռնումների, մեր կենսագրության համար, այլև խանգարում է ընկալել իր վեպերի խորությունն ու ուժը: Խանգարում է գնահատել նրա բերած նորությունը վիպային կառույցում, նաեւ ստվերի մեջ է թողնում նրանց գեղարվեստական բարձրագույն արժանիքները, նրա բերած նորությունները կերպարների, նյութի, հոգեկան խորը բացահայտումներով հագեցված զարմանալի լուծումներում: Այս միանշանակ մոտեցումը, կամ ընդունված համոզումը, որը շարունակվում է մինչեւ օրս, ենթակա է ավելի ստույգ մեկնաբանության: Սփյուռքահայ գրականագետ Մ. Նշանյանը նույնպես գտնում է, որ «այն սխալ է իր ահաւոր անբաւարարութեամբ»¹: Այդ անբավարարությունը ընդհանրապես նրա վեպերի մակերեսային ընկալումն է, տրվածի խորքերը չկարողանալ չթափանցելու ընթերցողների թերի կարողությունը: Այդ նույն սխալն էլ իր վեպերի բացասական գնահատման պատճառը դարձան: Ոչ միայն «Ծակ Պտուկը», այլ մինչեւ իսկ գլուխգործոց «Մնացորդացը», իր տարողությամբ եւ խորությամբ բացառիկ այդ վեպը, ընդունեցին սոսկ վերնագրի իմաստի մեջ եւ զլացան իրենց «մեկնողի հասկացողությամբ» խորանալ նրա էության ու ասելիքի մեջ: Անփութ այս վերաբերմունքով փորձեցին մինչեւ իսկ կասեցնել վեպի հրատարակությունը: «Ծակ Պտուկը» նույնպես համարվելով սոսկ մեր անցած բարքերը ներկայացնող գործ, ոչ միայն չի ընթերցվել, այլ մինչեւ օրս նույնիսկ ուշադրության, գրականագիտական ուսումնասիրության, լուրջ հետազոտության չի արժանացել: «Տողեր» որոնք կը սպասեն եւ պիտի սպասեն դեռ իրենց մեկնութեան, իրենց ամբողջական տարողութեան հասկացողութեան»²:

«Ծակ Պտուկը» վեպը ընդգրկում է ոչ միայն բարքեր, այլ բազում հոգեբանական ապրումներ ու հասարակական, քաղաքական բարդ իրավիճակներ, որոնց վրա խարսխված է եղել ոչ միայն հայի, այլ նաեւ մի ամբողջ հզոր պետության՝ Թուրքիայի կյանքը:

1 Մ. Նշանյան, Վեպ եւ արդիական սկզբունքը, էջ 94:

2 «Մայրիներու շուքին տակ», էջ 125:

Յուրաքանչյուր մարդ մի մեծ, ինքնուրույն աշխարհ է նրա վեպերում և մենք այդ աշխարհում տեսնում ենք մեր ժողովրդին ու նրանց միջոցով թափանցում մեր պատմության մեջ, այնտեղ գտնելով մեր կորցրած դիմագիծը: Նույն ձևով նա ստեղծեց նաև թուրքի դիմագիծը:

Ամբողջովին անտեսված է նաև այն հանգամանքը, որ նրա ներկայացրած հայ գյուղը միայն իր բարքերով ու կենցաղով չէ, որ դարձրել է վեպ: Այդ ավանդական օրենքների մեջ խմորվում են քաղաքական արագ աճող իրադարձություններ, այնտեղ ծնունդ են առնում նոր դիմագծեր, իրական բնավորություններ, անհատականություններ, որոնք հետո փոխելու են մեր ազգի ապագան ու ծակատագիրը և ամենակարեւորը՝ օրեօր փոփոխվող հայի կյանքի լայն ընդգրկումն է տեղադրված իր վեպում: Սյուժետային նրա անցումներում յուրահատուկ են հոգեբանական դրամատիկ իրավիճակները, սուր բախումներով բարդացված հարաբերությունները և զգացմունքների հեղեղով լեցված սիրային տեսարանները: Հազարամյակների ավանդությանը հնազանդ ընթացող կյանքի շղթայում հանկարծ հայտնվում են Նազիկը և Ջաքարը, ուժեղ անհատականություններ, ժամանակի կաշկանդումներից դուրս բնավորություններ, որոնք իրենց սիրո հաստատականությամբ փշրելու են ընդունված բարքերն ու սահմանված բոլոր օրենքները:

Սխալ է Յ. Պերպերյանի այն համեմատությունը, որ «Յունական ողբերգութեան մը պէս Օշականի մոտ կը հանդիպինք անհատի սեռային խիզախումին և գիւղի աւանդութեան-օրէնքի բախումին, ուր մեղքը, ոճիրը, քաջութիւնն ու գիւղական աւանդութիւնը կը միաձուլուին»¹: Յ. Պերպերյանը այստեղ անտեսում է մի շատ կարեւոր հանգամանք: Հունական ողբերգություններում սիրո խիզախումները մախ և առաջ սիրող զույգերի իմացությունից դուրս, ծակատագրորեն նախատեսված իրավիճակներ են, որոնք իրականությունը բացահայտվելուց հետո, անմիջապես փոխում են իրենց ընթացքը: Սիրահարները ոչ թե շարունակում են իրենց կապը, այլ վերջ են տալիս իրենց կյանքին այդ իրականության բացահայտումով: Եվ երկրորդ՝ դրանք արդեն ողբերգության դասավորումով ստեղծված կապեր են: Իսկ Օշականի մոտ Նազիկի և Ջաքարի սերը ամենադրամատիկ պահում, սովորական մի ականթաթթում ծնունդ առած սեր է և իրականության պարզումից հետո, էլ ավելի խելահեղորեն զարգացող, բոլոր արգելքներն ու պատնեշները, հազարամյա բարքերն անգամ ոտնակոխ անելով իրար հասնելու գիտակցական արարք: Ուրեմն այստեղ բացակայում է հունական ողբերգությունների ազդեցությունը և որ այդ միաձուլումը միանշանակ չէ: Վկան Նազիկի և Ջաքարի սիրո խելահեղ զարգացումը հարսանեկան ահավոր գիշերից հետո, կրած զրկանքներից ու նվաստացում, դժվարություն-

1 Յ. Պերպերյան, Ծակ Պտուկը կամ Անհատի ծառացումը շրջապատի դէմ, «Բագին», 1984 թ., էջ 8:

ներից հետո կրկին իրարից անկախ իրար ունենալու ձգտումը, նրանց հանդիպումը Կարմիրենց Սահակի պարտեզում, նրա տանը, կամ դայակ Մելեքի տան թաքստոցում: Մինչև իսկ միայնակ Նազիկի երթը անտառ, իրիկնամուտին, Չաքարին փրկելու Հայրապենց տղաների վրեժից: Այստեղ հակառակը՝ մեղքը, ոճիրը, քաջությունը առանձնակի դեր են կատարում ավանդույթ-բարքերի պատմեշների դեմ: Թեև ձակատագիրը տնօրինող մախախնամության ուժը, որի ազդեցությունից խուսափելու անկարելիության միտքը ղեկավարում է մարդկանց, բայց Նազիկն ու Չաքարը դեմ են գնում այդ ձակատագրին:

Օշականի վեպերը «հարցերը ձակատեն դիտելու անվախ ձիգ մըն է», այսինքն՝ նա չի գունավորում, կամ հասարակության ճաշակի պահանջին չէ, որ հարմարեցնում է իր վեպը: Ճիշտ է գնահատել Մ. Հերկեյանը վիպասանի այդ առանձնահատկությունը՝ «Հաճելի եւ հետաքրքրական դառնալու համար, Օշական երբեք չի գիշեր օրուան ճաշակներուն, ոչ ալ կը բաւարարուի սովորական մակարդակներով: Ան միշտ կը ձգտի ներքին ոլորտներուն»¹:

Համաձայնվելով Հերկեյանի գնահատումին՝ ավելացնենք, որ Օշականը ունի իր ուրույն ուղղությունը կյանքում տեղ գտած հազարավոր իրադարձությունները իր ամբողջ խորությամբ գրականություն փոխադրելու: Նա չի մեղմացնում, գունազարդում անհետացող անցյալը, եվրոպական վեպերի «ռոմաններ» մեխոգրամատիկ սյուժեների վրա չի կառուցում իր վեպը: Ինչպես նկատել է Վ. Օշականը. «Իրեն համար ոճ, լեզու, գրական սեռ ու տեսութիւն՝ թէ անհրաժեշտ միջոցներ են եւ թէ ալ, նոյն ատեն արգելքներ, խոչընդոտներ են՝ իրեն ու կենանքի ապրումին անսահմանելի իսկութեան միջեւ»²:

Կյանքի ապրումի իսկությունը դաժան պայքարն էր, որի վրա էր հիմնում նա իր վեպերը: Պայքար ոչ միայն ապրելու, այլ ազատ, բոլոր տեսակի կաշկանդումներից ու պարտադրված օրենքներից ազատագրված ապրելու ձգտման վրա է հիմնված վեպի գաղափարը: Շատերը ելնելով այն հանգամանքից, որ նա ստեղծագործել է գոյապաշտության գրական ուղղության շրջանում, իր վեպերն էլ հիմնված լինելով կյանքի գոյատևման պայքարի վրա, Օշականին համարել են գոյապաշտության հետեւորդ:

Նախ եւ առաջ ինքը պատասխանել է իրեն այդ ոճի հետեւորդ համարողներին իր «Համապատկեր»-ում՝ «Օշական կանգիտանայ իրապաշտութիւնը իբր իր կողմէ որդեգրուած վարդապետութիւն»³:

Առաջին՝ մենք ոչ մեկ պատճառ ունենք չընդունելու իր անձի համդեպ անաչառ ստեղծագործողի այս երաշխիքը: Երկրորդ՝ «Ծակ Պտուկը» ինքնին հաստատումն է իր տված երաշխիքի:

1 Մ. Հերկեյան, Մինչև ո՛ր, էջ 137:

2 «Բազին», էջ 11, 1998 թ.:

3 «Համապատկեր», հ. 10, էջ 103:

Եվ երրորդ՝ ինչպես նկատել է Վ. Օշականը, «Օշական իր ծամփով կը հասնի իրապաշտութեան բոլորովին մէկ տարբեր սահմանումի»¹:

Ո՛րն է այդ «սահմանումը»: Դա կյանքի այն ընդարձակ փոխադրումն է, որը աստիճանական աճ է ապրում իր ստեղծագործություններում: Իր պատմվածքներում կյանքի դրվագներից սկսվելով, իր վեպերում հասցնում է ամբողջական ծավալի եւ այդ ծավալում ընդգրկում տարբեր շեղումներ, որոնք հեղեղի պես հորդում են իր վեպերի տարբեր մասերից, լիցքավորելով, ընդլայնելով իր ասելիքը: Նրա անցումները արագ են, մանրամասն նկարագրություններով ու վերլուծումներով եւ նաեւ իր անմիջական միջամտությամբ լեցված: Եվ զարմանալին այն է, որ սովորաբար, որքան շատանում են շեղումները, այնքան ավելի է բարդանում նրանց հավաքագրումն ու այնտեղ նետվածի արդարացումը: Այստեղ է ահա Օշականի ինքնատիպությունը եւ գոյապաշտության հերքումը: Նա չի հետեւում արվեստի ոչ մեկ սահմանումի, ոչ մեկ կադապարի: Ընդարձակվում է այնքան մինչեւ բավարարված է իր ասելիքով, որը միշտ անսահմանորեն առատ է անշուշտ, եւ այդ բազմազանությունը ուզած պահին աննկատելիորեն կապում, հավաքագրում է զարմանալի բնականությամբ ու արվեստով: Չմոռանա՞նք նաեւ, որ գոյապաշտության, «էկզիստենցիալիզմ»-ի մեջ ես-ի գերիշխանությունը ստեղծագործության հիմնական առանցքն է կազմում: Բարոյական եւ բարքերի ըմբռնումներում գերիշխողը անհատի շահերն են հանուն կյանքի: Ընդհանուրի՝ հասարակական, բարոյական ըմբռնումները՝ հայրենիք, ժողովուրդ, ազգ հասկացողությունները միանգամայն բացակայում են: Ասպարեզում անհատն է՝ իր ես-ը, որը ոչ մի բանի առաջ չի կանգնում իր պահանջները բավարարելու համար: Իսկ Օշականի վեպերում ես-ը, այդ ես-ի՝ անհատի, միայնակ պայքարը ապրելու համար բացակայում է: Կյանքի, ապրելու պայքարը անհատից տարրալուծում է ժողովուրդ, ազգ հասկացողության մեջ: Նրա ներկայացրած մարդիկ սոսկ գոյատեւելու, իրենց կյանքը փրկելու, կամ իրենց հաճույքների համար չէ, որ ապրում են: Կյանքը նրանց հեշտորեն չի տրվում, նրանք խլում են այդ կյանքը, պայքարով պոկում, վաստակում, իրենցը դարձնում: Ապրում են բնությունից օժտված լավ ու վատ մարդկային զգացողություններով եւ միաժամանակ իրենց մեջ արմատացած բարքերով իմաստավորում իրենց գոյությունը:

Իր կենսագրությունից արդեն գիտենք, որ իր ամբողջ կյանքը՝ մանկությունից սկսած մինչեւ մահ, եղել է գոյատեւման պայքար: Իր ներաշխարհն ու հայացքները ձեւավորվել են այդ տաժանակիի պայքարում: Եվ ապրելու, գոյատեւելու մոլեգին ձգտումը կոփել է իրեն, որը դարձրել է իր գրականության հենքը, հավատամքը, որովհետեւ դա ոչ միայն իր, այլ նաեւ իր ժողովրդի

1 Վ. Օշական, Յ. Օշական 20 տարեկան, «Բագին», 1998, էջ 11:

կյանքն էր: Ապրելու, շարունակություն թողնելու մարդկային հեքը նա հենց այնպես չի փոխադրել գրականություն, այլ իր մեծ մտածողի վերլուծում պրիզմայից անցնելուց հետո իմաստավորված ու խորացած հանձնել է թղթին: Գոյատեւման այդ կոպիտ ու դաժան պայքարը, որում ծնվել ու հասակ էր առել նա, մենք տեսնում ենք իր այս վեպում: Սեր, ատելություն, կիրք, վրեժի զգացում, սպանության մոլուցք, արյան կանչ, հոգու խռովքներ, ճակատագրի առեղծված, ներքին տվայտանքներ, տառապանք, հնամյա սովորությունների կապանքներ, տգիտության իշխանություն, ահա այս ամենն են պարփակվում նրա ներկայացրած կյանքի գոյատեւման պայքարում, որը եւ ժամանակի, եւ իր ժողովրդի դիմագիծն էր:

«Ծակ Պտուկը» վեպը ստեղծված լինելով իրական եղելության վրա, կյանքի բազմազույն դեմքով է ներկայացված: Ըստ Օշականի՝ «Գրել կը նշանակէ Կեանքը հիւսել»¹: Իսկ ի՞նչ ենք հասկանում «կեանքը հիւսել» իր բնորոշման մեջ: Ահա իր բացատրությունը՝ «Կեանքը իբրեւ տաք երեւոյթ, ճերմակ թուղթի սեւ տառերը փոխակերպող»²:

«Այդ «տաք երեւոյթը» անմիջական կյանքի առկայությունն է, նրա զարկերակի շունչն ենք զգում իր տողերում: Այնտեղ անհատը հասարակության դեմք կամ առանձին կերպար չէ, այլ շաղկապված է կողքինին, հարեւանին, ամբողջ գյուղին կամ գավառին, բարքերին, ծեսերին, միջնեւ անգամ ազգային ձգտումներին, ինչպես կյանքում է: Տնով, հարեւանով, թաղերով, ամբողջ գյուղով ապրող մարդկանց կյանքի պատմությունն է բնականորեն մեզ հրամցվում այնպես, կարծես մենք ներկա ենք, քայլում ենք նրանց փողոցներով, ապրում այնտեղ, շփվում նրանց հետ: Օշականը կարողացել է նվաճել կյանքի ռիթմը եւ այն բառերի վերածել: Կյանքը, բնությունը, շրջապատը, հոգեկան զգացումները, մարդկանց փոխհարաբերությունը, բնազդը, այս ամենը համադրված հարաբերությամբ, իր յուրահատուկ նկարագրով է մատուցվում մեզ: Այս ամենի առկայությամբ է, որ մի հսկա սիմֆոնիայի համահնչունությունն է զգացվում վեպում, իրար շաղկապված, իրար լրացնող, իր զարգացման գազաթնակետով եւ իր վերջաբանի հավաքագրված հնչեղությամբ:

Չուտ հայաբնակ գյուղը, ուր կատարվում են «Ծակ Պտուկ»-ի դեպքերը, սովորական, ոչնչով առանձնահատուկ գյուղ է, իր տների, իրար փակած բակերի ու տանիքների կառույցով, փողոցի աղբյուրներով, որն ինչպես ամենուրեք, այստեղ էլ գյուղի կամանց բանբասատեղին է, իր եկեղեցիով, գերեզմանոցով, արտերով ու շրջապատի անտառածածկ լեռներով, որը միաժամանակ ասպատակների պատսպարարան է: Նկարագրվող յուրաքանչյուր տեղ շաղկապված է վեպի հոգեբանական անցուղարձին, միահյուսված կատարվող դեպքերին,

1 «Համապատկեր», էջ 209:

2 Նույն տեղում:

որով ստեղծվում է տվյալ ժամանակաշրջանի ժավալուն փաստագրությունը:

Օշականի լեզուն հարուստ է, խորը, պատկերավոր, պիրկ, հաճախ էլ դժվար, իր որդու՝ Վ. Օշականի խոսքերով՝ խորդուբորդ: Այնտեղ կարծես «դրոշմված է իր ժողովրդի անցած ուղին», - ասում է նա: Շատերը այն համարում են դժվարընթեռնելի եւ դրա մեջ են տեսնում նրա գործերի անընթեռնելիության պատճառը: Դիշտ է, որ նրա բառամթերքում շատ են թուրքախառն բառեր, բարբառային դարձվածքներ, մինչեւ իսկ այսօրվա օգտագործումից դուրս եկած բառեր, բայց հայոց լեզվին լավատեղյակ այս գրողը այդ ամենը օգտագործել է միջավայրի ճիշտ պատկերը տալու, ավելի կենդանի դարձնելու այդ ժամանակաշրջանը եւ ամենակարեւորը այդ շրջանում ապրած մարդկանց ամբողջական նկարագիրը տալու: Ի վերջո լեզուն է ամբողջացնում մարդկային նկարագիրը: Ինքը Օշականը հետեւյալն է պատասխանել այդ մարդկանց՝ «Իրենց կարդացածը չհասկցող մարդո՞ց է մնացել հայ գրականութեան իրաւ արժէքներուն պաշտպանութիւնը»¹: Որքան էլ ծանր հարված է եղել իր գործերի անընթեռնելի մնալը, միեւնույն է, նա չի փոխել իր մոտեցումը, իր ոճը, իր լեզուն: Անշուշտ վիպասանի հանդեպ այդ մեղադրանքը սոսկ արդարացուն է այն բանի, որ ինչպես նկատել է Ն. Թարխուտյանը՝ «<. Օշականի ոճին վերագրուած խրթնութիւնը անճիշտ որակում մըն է, կատարուած բոլոր անոնց կողմէ, որոնք նախապէս չեն հասկցած անոր միտքը եւ կը նմանին այն մարդոց, որոնք կուզեն արկղ մը բանալ՝ առանց գիտնալու անոր ծածկագիր թուանշանները»²: Այդ «թվանշաններում» առանձնակի տեղ է գրավում նրա ոճը, այսինքն այն հյուսվածքը, որով ստեղծում է գրականությունը, ուր առանձնանում է պատկերներ ստեղծելու նրա անկրկնելի կարողությունը: Հենց թեկուզ սկսենք վեպի սկզբից: Այն սկսում է շարժապատկերային տեսանելիությամբ, օրվա, արեւի, շրջապատի շոշափելի գույներով ու ռիթմով: Այնքան շոշափելի է տված նկարագիրը, որ զգում ես փողոցի կամ տան արեւոտ ու ստվերոտ կողմերն անգամ: Շատ հանդարտ, գյուղին հատուկ առավոտվա պարզությունն է սփռվում մեր շուրջ: Կարծես ոչ թե պատմում, այլ վարպետ իր վրձնով նկարում է մեզ համար: Ամառային խաղաղ առավոտվա այդ պատկերում Հաճի Ստեփանի անթափանցելի տան դուռն է զարկում մի հիվանդոտ պատանի՝ Թումասիկը: Այդ թույլ դռան զարկին պատասխանում է մի աղջիկ, որը դժվարությամբ է ներս ընդունում պատանուն: Դռան այդ զարկը, այդ խաղաղ առավոտվա պատկերը, հետո անակնկալորեն փոթորկվելու է, դառնալու է մի ամբողջ ողբերգության կծիկի սկիզբ, մարդկային ցավի ու կորուստների պատճառ: Դժվարությամբ դուռը բացող աղջիկը դառնալու է Նազիկ, անգիտակցորեն դառնալու է կին: Ամարգվելու, նվաստանալու է, բայց այդ

1 «Նայիրի» շաբաթաթերթ, 1970, 44:

2 Ն. Թարխուտյան, Օշականի ոճային գլխաւոր յատկանիշը՝ պատկերը, էջ 130:

ճանապարհին ճանաչելու է ինքն իրեն, իր էությունը: Սիրելու է, կյանքից վեր դասելով իր սերը, ունահարելու է ընդունված բարքերը եւ իր ընտրությամբ մեռնելու իր սիրած էակի թելերի մեջ:

Օշականի ստեղծած պատկերներում ծայն կա, գույն ու երանգ, սրտի զարկ: Ահա թեկուզ մի աննշան պատկեր՝ «Ջաղացքին տանիքէն դարաւոր սօսին սկսաւ իր թաց ու կաթկթուն երգը: Ամբողջ շրշիւն ու փափկութիւն: Նազիկին համար մարդկային շրթունքներու եւ հեծծանքի համ մը տրոփել առաւ ծառին ընդարձակ սիրտէն: Ու հովին հեծին տակը ըսես անոր ոսկորներն էին լացողները, քանի որ երկինքը ամպ չուներ» (էջ 124):

Այսպիսի բանաստեղծական պատկերներով է անվերջ լեցված վեպը:

Այս անակնկալներով, խորության տարբեր շերտավորումներով հագեցված վեպը Օշականը սկզբում պատմելու է, հետո ինքը, որպէս մասնակից, իր հաճախակի միջնորդումներով ներկայացնելու, բացատրելու է եղելություններ, որոնք կարեւորագույն դեր են խաղալու վեպում: Կենսագրությունների, բարքերի, սովորությունների մանրամասներ է հրամցնելու, վեպն ամբողջության մեջ ավելի տարողունակ դարձնելով: Մի խոսքով, ինքը ներկայություն է դառնում վեպում, երբեմն այնքան շոշափելի, որ առաջնորդում է մեզ դեպքերի եւ գործողությունների միջով, դառնում վեպի անբաժանելի մասնիկը, ավելի մանրակրկիտ բացատրություններ տալիս մեզ կենսագրական կամ ազգագրական-պատմական առումներով: Իր գեղարվեստական այս ինքնատիպ միջամտությամբ, ընդունված դասական վեպի հասկացողության ու կառույցի մեջ մի նոր ուժ ու ուղղություն ստեղծեց նա:

Պատումի մեծ կտավի վրա տարածեց իր ժողովրդի ապրված կյանքի հատվածները, ուր ընդգրկեց եւ պատմություն, եւ հերոսություն, եւ դյուցազներգություն: «Այս պատմութեան օրերուն ան (ժողովուրդը) կը կռուէր, կը սիրէր կռուիլ» (էջ 182) (ընդգծումը իմն է): Իր միջամտիս այս բացատրությունը մի ամբողջ ժամանակաշրջան ու ժողովրդի ոգու ծալքեր է բացում մեր առջեւ: Այս նույն բացատրության սկզբում նա տալիս է հետագա մեր ժողովրդի ողբերգային ձակատագրի նաեւ պատճառը, եւ վեպի մեջտեղում, վեպի վերջավորությունից անկախ, դեռ նույնիսկ դրան չհասած, իր հերոսի եւ նույն ժողովրդի անցնելիք սարսափների մասին հայտնում նաեւ: «Անիկա (Ձաքարի մասին է խոսքը) տակաւին հեռու էր այն անկարող կատաղութենէն, որով պիտի կրծէր իր հոգին, իր աղիքները, տասնհինգ-քսան տարի ետք, երբ հայկական սարսափներէն ետք հոգեպէս նուաճուած գեղացին գլուխը կախ պիտի արժանանար թափափուած ոստիկանի մը անցքին, հանդուրժելով անոր թուքն ու նախատինքը ու պիտի չշարժէր» (էջ 182): Առաջին հայացքից վեպի հանգույցի լուծումի հետ կապ չունեցող այս մեջբերումը հետագա մեր ժողովրդի ոգին բնութագրող շատ կարեւոր բանալի է դառնում: Վերլուծելով վեպի

ժամանակաշրջանին հաջորդած տարիների իրադարձությունները՝ նա փորձում էր պատմական հեռանկարի մեջ դիտել հետեւանքները:

Իր համար որպես ստեղծագործողի կարեւոր էր ժողովրդային դիմագծի մանրակրկիտ պատմությունը հասցնել մինչեւ վերջ: «Ծակ Պտուկ»-ի դեպքերը այն ժամանակաշրջանն է ընդգրկում, երբ հայը պաշտպանում էր ինքն իրեն եւ թուրքերի պայքարն էլ հայի դեմ մոր էր պետական ծրագիր դառնում: Սա անհրաժեշտ էր եւ վեպի կառույցի, եւ որպես ընթերցող ժիշտ ընթմելու համար տվյալ ժամանակաշրջանը: Իսկ մեջքերման երկրորդ հատվածը, արդեն այդ ժամանակաշրջանից դուրս է, ավելի հետո, բայց կրկին իր հերոսի եւ իր ժողովրդի ապագան ներկայացնող: Ուրեմն պետք էր խոսել այդ մասին: Սա Օշականի մտածված, մշակված ծրագրով ստեղծագործելու կարողություններից մեկն է: Նրա այս եզակի արժանիքն էլ իր գործերը դարձնում են պատմահոգեբանական մեծ ընդգրկումների ստեղծագործություններ:

Նա հաճախ է անդրադարձել գրողի կոչմանը, իրականության հետ նրա կապի առնչությանը, կյանքի բազմածավալ վերլուծումների գրողի պարտականությանը: Իր վերլուծումներում առաջնահերթ տեղ է գրավել կյանքը իր մերկ իրականությամբ: Քանի որ այս վեպում նա ներկայացնում էր Նիկիո լճի շրջանի կյանքը՝ ապրված 1800-ական թվականներին, բնականաբար անկարելի պիտի լիներ չներգրավել թուրքին, որի ամենօրյա ներկայությունը հայի կյանքի մասն էր կազմում: Վեպի երկրորդ մասում նա ներկայացնում է հայի առօրյայի այդ կողմը: Հայ գյուղերի ընդարձակումով, թուրքերի հետ շփումը ավելանում էր, ավելացնելով նաեւ ազգի ինքնության վտանգը: «Այդ խժուղին մէկ-երկու տարուան մէջ գեղին սահմանները ու պատմէշները խրամատած էր լայնօրէն: Տասը տարի առաջ ամայի խաղավայր մըն էր, այսօր իր քազինոները, սրճարանները, խանութները իրարու դէմ կը շարէր: Հոն կու գային թուրքերը, փաթթոցով ու մօրուքով ու կը հրապուրէին գեղին աղքատիկ բայց գեղադէմ տղաքը, զանոնք բարձր վճարումով իրենց հողագործական աշխատանքին վարձելով եւ ուր այդ գեղանի տղաքը կը մուրդէին անոնց կիներէն ու աղջիկներէն հաւատքնին ուրանալով» (էջ 19):

Հայ շրջաններում սկիզբ առնող տեղայնքային, դեմոգրաֆիկ արագ աճող այդ փոփոխությունը լեցված թուրքերի ոտնձգումներով, բնականաբար վտանգ էր ներկայացնում հայ բնակչության ոչ միայն անմիջական կյանքին, այլ գոյատեւման ընդհանրապես: Ժողովուրդը ներքին եւ արտաքին երկու միջոց ուներ պաշտպանվելու: Ներքին, այսինքն՝ իր բարքերի ու ավանդույթների խիստ պահպանմամբ, եւ արտաքին՝ զենքով նրանց ոտնաձգումներից պաշտպանվելով:

Դեռ հեղափոխություն հասկացողությունը չկա ժողովրդի մեջ: «Յեղափոխութիւնը ոչ հասկնալի, ոչ ալ մատչելի էր այս տգէտ ու վայրենաբարոյ գեղե-

րուն» (էջ 173), բայց նոր սերունդը սկսել էր ըմբոստանալ եւ չհանդուրժել ոչ Հաճի Ստեփանի անվերջանալի կռիվները գյուղում, ոչ էլ թուրք ոստիկանների ոտնձգումների դեմ գյուղացիների բարձր կաշառքով ժամանակավոր համագիստ նվաճելու գործարքները: Նոր սերունդի հետ ծնվել էր նոր հոգեբանություն, որը պայքարի, իր իրավունքը պաշտպանելու հոգեբանությունն էր: Բարքերի, մտածելակերպի ու հիմնականում թուրքի հանդեպ հայի վերաբերմունքի շեշտակի փոփոխությունն էր իր վեպերի առանցքային մասը կազմում:

«Հաճոյք էր այդ բարեկամ տղաքը ծանչնալ մանաւանդ քաջութեան պսակով մը» (էջ 94): Այդ երիտասարդները, որոնց քաջությունը «ցեղին հազարամեայ գերութեան մէջէն կը բարձրանար», հիմք դրեցին մեր ազգային ազատագրական պայքարին եւ դարձան իր այս վեպի գործող անձինք: Չաքարենց Չաքարը, Փանելենց Նշանը, Պանապաքը, Հաճի Ստեփանը, Հայրապենց տղաները, որոնք իրենց գյուղի, իրենց գյուղացիների իրավունքները պաշտպանող առաջին քաջերը դարձան: Օշականը նրանց տվեց մի նոր անուն՝ ասպատակ, միեւնոյն ժամանակ ըստ իր սովորության ներկայացնելով նրանց արածի իմաստն ու պատմությունը: «Այդ օրերուն, երբ յեղափոխութիւնը դեռ անուն ու «ֆիրմա» չուներ, ասպատակը ընթացիկ ու գռեհիկ ոճրագործ մը կը նկատուէր»: Բայց ավելի ուշ, երբ արդեն սիստեմատիկ են դառնում թուրքական կողոպուտն ու ճնշումները, փոխվում է նաեւ ասպատակների դերը: «Ասպատակը գեղին պաշտպանն էր: Անոր անունը լեռներուն վրայ մշտագոյ հսկողութիւն մըն էր: Ան գեղէն դուրս իր ազդեցութեան ենթակայ ընդարձակ սահմաններ ունի» (էջ 210): Ասպատակի կյանքին ու գործունեությանը ավելի մանրամասնորեն ծանոթանալու ենք «Հաճի Մուրատ»-ում, իսկ այս վեպում Չաքարով մենք մակերեսայնորեն ծանոթանում ենք դեռ նոր սկիզբ առնող, անհատների նախաձեռնությամբ զարգացող մեր հետագա ազատագրական պայքարին:

Օշականը իրական կյանքից է վերցրել Չաքարի կերպարը: Ինքն անձամբ ականատես է եղել մի հայ երիտասարդ ասպատակի աներեւակայելի քաջագործությանը եւ որպէս նախատիպ օգտագործել է նրան: Թեեւ Օշականը չի խորացնում Չաքարի ասպատակության գործունեությունը, նրա պայքարը դեռ միայն թուրք ավազակների դեմ է, որոնք մեծ վնաս են հասցնում իրենց գյուղի հայության, բայց զգալի է հեղինակի վերաբերմունքը այդ ազատատենչ անհատների հանդեպ: Սրանք ֆեդայիների նախատիպերն են, որոնց հետո իր հերոսներից Չաքարն է միանալու, բայց ոչ այս վեպում:

Բոլոր ազգերի պատմության մեջ էլ քաջերն ու գեղեցիկները յուրահատուկ ժողովրդային սեր են վայելել, նույնպես եւ մեզ մոտ: Հեղինակը այդ ժողովրդային սիրով է շրջապատում նաեւ Չաքարին: Կռվում միայնակ նրա բազկի ուժն ու ձկունությունը, նրա հմայքը գյուղացիների մեջ, նրա զուսպ բարոյական նկարագիրը դյուցազներգության է հասցնում: Նրա անվան շուրջ հյուսված

անցյալի պատմություններն անգամ որպես առասպել դարձած դրվագներ մատուցում վեպում: «Եւ այրած վրանները, դիակները, առանց պզտիկ հետք մը ձգելու սպանդէն: Սուտի մը պէս այս պատմութիւնը նուիրագործեց անոր համբաւը: Ու այն օրէն ասդին անհկա գեղին ուժերէն մէկը նկատուեցաւ: Ու կը սիրէր անոր արու ու հայկական քաջութիւնը իր գեղը» (էջ 58 29): Դու-ցագնեբզությունը լիարժեք դարձնելու համար օգտագործելով գյուղացիների մեջ նրա վայելած սերը, արտաքին գեղեցկությունը միացնում է բարոյական բարձր պահվածքին՝ «Ու անոր պարկեշտութիւնը, որ սուրբի մը պէս ցանկալի ըրաւ իր նայուածքը» (էջ 58 30): Նա չի սահմանափակում գեղարվեստական պատկերի տարածքը, այլ բացում, լայնացնում է, ընդգրկում այնտեղ նաեւ ժողովրդին, նրա միակամությունը եւ ասպատակների գործունեության եւ թշնամու հանդեպ: Չատկկա շաքաթվա թուրքերի հետ բախման ժամանակ Չաքարին են միանում ոչ միայն գյուղի քաջերը, այլ ամբողջ գյուղը մեծով ու փոքրով, երեխաներով, հարսներով ու ծերերով: Հայրապետն տղաները իրենց վրեժը մի կողմ թողած միանում են Չաքարին թուրքերի դեմ կռվելու համար եւ օգնում նրան փախչելու նրանց հետապնդումից: Իսկ վերջաբանում ծանր վիրավոր Չաքարին ոչ թե թուրք կառավարությանը, այլ հայ փայտահատներին հանձնելը, ազգային նույն սերտ կապի արտահայտությունն է: «Անհկա չէր կրնար իր ձեռքովը թուրքերուն յանձնել այսքան արիասիրտ երիտասարդ մը» (էջ 230):

Այս վեպում ասպատակների գործունեության վրա քիչ է կենտրոնացնում հեղինակը, հարազատ մնալով ժամանակաշրջանի իրադարձություններին: Վեպի վերջավորության ընդգծելով թուրքերի աճող թշնամանքը հայերի հանդեպ, մեկ անգամ եւս շեշտում է հայերի պայքարի ավելի մեծ ու կազմակերպված անհրաժեշտությունը, որը բնականաբար միայնակ պայքարող ասպատակների ուժից վեր էր արդեն:

Իր խորաթափանցությունը կատարվող իրադարձությունները բացահայտելու եւ գործողությունների ընթացքում դրանք վերլուծելու, առանց խախտելու վեպի կառույցը, կատարելության է հասնում: Դայակ Մելեքի տան շրջափակումը թուրք զինվորների կողմից, Նազիկի քայլերին հետեւելով Չաքարի թաքստոցի հայտնաբերումը, ամբողջ գյուղի վերաբերմունքն ու մասնակցությունը այդ մեզ համար տարօրինակ, բայց իրենց համար սովորական դարձած սպանությունների ու ձերբակալությունների գործողությանը, դրա փայլուն վկայությունն են: Արվեստի փայլուն հմտությամբ նա իրար է միահյուսում ներքին զգացողությամբ առաջնորդվող ամբոխի բախումը թուրքերի հետ: Նրանք գիտեն երբ եւ ինչպես կռվել, ուր իրական կռիվ մղել կամ պարզորեն օդի մեջ կրակել, զոհ չտալու, կռիվը չսրելու համար: Նույն հմտությամբ կապակցում է անցյալը, ներկան եւ ապագան: Հաճի Ստեփանի համագործակցությունը

թուրքերի հետ անցած շրջան է արդեն հայի կյանքում: Ներկան՝ Չաքարի նման ասպատակների դեմ թուրքերի համախմբված պայքարն է, նրանց մեջ աճող քաղաքական ուժ տեսնելով: Իսկ ապագան թուրքերի, տիրոջ իրավունքով, գյուղ ներխուժումն ու մինչև իսկ հայերին իրար դեմ օգտագործելու խորամանկ միջոցներն են: Հայրապենց տղաների համագործակցությունը թուրքերի հետ Չաքարին գտնելու և իրենց հանձնելու քայլերը:

Նա իր ներքին սուր տեսողությամբ տեսնում էր մինչև իսկ մոտեցող քաղաքական աղետը, ինչ անտեսանելի էր այդ ժամանակաշրջանի մարդկանց: «Դեռ երկու ժողովուրդները իրարմէ զատող ատելութիւնը մահուան ստուգութեան մը չէր վերածուած» (էջ 190): Այդ առասպելի, դյուցազներգության մոդոլ բախումներում նա տեսնում էր գալիք սպանող, իրականությունը, արդեն քաղաքական սուր բնույթ ստացող հայի ու թուրքի հարաբերությունը:

Արվեստի նույն բարձրությամբ, գեղագետի նուրբ վարպետությամբ, այդ անհամազօտ, իրար բախվող աշխարհում նա պեղում է մարդկային զգացումների ու նրանց խոհերի զարգացումները, ներկայացնում անձնական զգացումների, հատկապես տառապանքի հեղեղները, որը կրում են մարդիկ իրենց հոգու խորքերում միայնակ, լռությամբ ու տքնությամբ: Նույն կտուրի տակ ապրող ընտանիքի երեք անդամները՝ Հաճի Ստեփանը, մայրը՝ Հաճի Խաթունը և Նազիկը իրենց հոգում կրում են տառապանքի տարբեր թաքուն ապրումներ, նրանցից ոչ մեկը տեղյակ չէ մյուսի ապրումներից, հոգում կատարվող ալեկոծումներից, ինքնաբեկություններից: Նույն վիճակում են նաև նրա մյուս հերոսները՝ Չաքարը, Չաքարի մայրը՝ Մարիամը, Կարմիրենց Սահակը, նրա մայրը, յուրաքանչյուրը առանձին, անձնական մեծ դրամա են կրում իրենց հոգում: Սա չէ՝ արդյոք իրական կյանքը, որն այնպես ուշադրությամբ փոխադրել էր վիպասանը իր ստեղծագործության մեջ:

Մարդկային զգացումները բացահայտելու մեջ Օշականը իրապես անկրկնելի հոգեբան է: Նա մինչև իսկ հայտնաբերում, բացում է մարդկային հոգու խորքերում կատարվող զգայական շարժումները: Լեռներում, Չաքարի մեջ Նազիկի հանդեպ աճող զգացումը՝ «կը յառնէր, անդունդէն բարձրացող ոգիի մը պէս, զգացումը ու կը պարուրէր անոր մարմինը, մազերէն մինչև եղունգները: Ու կը հաւաքուէր մարմինին զանազան կէտերուն, ծանր ու շօշափելի: Կար անիկա մատներու ծայրին, ուր կ'ըր կրակի մը պէս կը թրթռար ու անոր միտքը կը տանէր եղբրական գիշերին» (էջ 214):

Չարմանալիորեն նա գիտակ է և երիտասարդի, և ծերունու, և կնոջ, և պառապի, և հիվանդ մեռնող պատանու, և երիտասարդ աղջկա հոգում կատարվող փոփոխություններին և հոգեբանությամբ: Նա նույնիսկ հիվանդության ֆիզիկական երեւոյթին է մեկնաբանություն տալիս: Ահա թոքախտավոր Թումասիկի տառապանքից մի պահ՝ «Պրկուեցան անոր երեսները: Ու

կապուտցան անոր շրթները, եւ ուռեցան անոր աչքերուն գունտերը, մինչ կը փոսնային կապիժները: Ու բերնին մէջ զգուելի համ մը մոխիրի, որ սարսափի փոխուեցաւ երեսին վրայ: Արիւն էր կրկին կուլ տուաւ» (էջ 17): Իսկ Չաքարի եւ Նազիկի դժբախտ բաժանումից հետո նրանց առաջին գաղտնի հանդիպումը Կարմիրենց պարտեզում վերածում է բանաստեղծական խորը պատկերի. «Պառկած է ըսաւ Նազիկ: Ու բառը մեղմ էր: Ու բառը միւս էր, շարժուն ու թափանցող: Տղուն ականջները կարծես անոր շրթները կառնէին ներս դէպի հոգին: Այս զգայնութիւնը այնքան հզօր էր, որ տաժանքի փոխուեցաւ իսկոյն, տաժանքը իրենց առագաստի գիշերուան: Վախը թէ ամօթը կը թօթուէին անոր ահարկու իրանը: Անձրեւէն թաց տղուն շրթունքը փնտռեց ու գտաւ տաքուկ սենեակէն դեռ չպաղած Նազիկին բերանը: Համբոյրը մեղմ էր, երկար ու միամիտ: Անպատմելի էր կարօտն ու յուզումը» (էջ 237): Ինչպես տեսնում եք, բառը բացակայում է գյուղացու հարաբերության մեջ եւ Օշականը զարմանալի հմտությամբ կարողանում է այդ բացակա բառերը վերծանել, նրանց հոգու ընդերքից հանել չարտաբերված զգացածը: Սովորաբար մեծ բանաստեղծներն են այդպես աշխատում: Նա իրապես բանաստեղծ է մարդկային հոգու ոլորտում եւ վիպային բանաստեղծ, եթե անշուշտ կա այդպիսի բնութագրում:

Իր այս վեպով մենք ծանաչում ենք անպատմելի ողբերգություններ իր լուսնայան մեջ ամբարող գյուղացուն: Առօրյա դժվարությունների ու ապրումների մեջ նա լուռ է, լուռ է ձակատագրի բոլոր հարվածների դեմ, կյանքի բոլոր ողբերգությունների դեմ: Ամեն տուն իր սովորությունների, իր բնազդների վրա հիմնած կյանքն ունի, որը հավաքվում է մի ընդհանուր ծածկի՝ սերունդն սերունդ իրար փոխանցված ավանդույթների ու անխորտակելի բարքերի մեջ: Այդ բարքերի մեջ բառեր ու ճարտասանություններ, մենախոսություններ չկան: Անհատի եւ հատկապես կնոջ իրավունքը սահմանափակված են: Կինը սովոր չէ իր զգացածը բառերի վերածելու: Աղջիկ, կին, տղամարդ, մեծ ու փոքր հասկանում են իրար դեմքի արտահայտություններով, հայացքով: Դարերով ուսումնասիրված, գիտության տեսության սահմաններից անցած, բնազդներով մարդկանց մեջ տեղավորված նշանագրերով են նրանք հաղորդակցվում: Հարսանեկան գիշերը Չաքարի ընթոստ հայտնվելը աստիճանների գլխին միայն մեկ նախադասությամբ՝ «Սպաննեմ պըտը...», հասկանալի է անհամբեր սպասող իր հարազատներին, որ իրենց հարսը կույս չէ: Կամ Նազիկի միակ եւ վերջին խոսակցությունը Չաքարի հետ: «Ալ կօգտէ քաշածս, ազատէ ինձի: Մեռնիլ է նէ, մեռնիլ: Ալ չեմ դիմանար»: Ի դեպ, ամբողջ վեպում սա Նազիկի ամենաերկար խոսակցությունն է, որ լսում ենք: Կտրուկ, արագ ասված այս խոսքերի մեջ իր ապրած ամբողջ ողբերգության պատմությունը կա, որին մենք արդեն ծանոթ ենք:

Օշականի դիտողականությունը վեր է սովորական մարդկային դիտողականությունից: Դա եզակի ստեղծագործողի դիտողականությունն է, որից

ոչինչ չի վրիպում ոչ մեր սովորություններից ու բարքերից; ոչ էլ մարդկանց ներաշխարհի ակնկոծումներից: Նա ոչ միայն տեսնում է, այլ տեսանելի է դարձնում ընթերցողին: Ավելին՝ նա իր տեսած-դիտածը տեղադրում է ժամանակի ծզգրիտ դիմագծի մեջ: Իսկ ժամանակը, ինչպես գիտեք, բարքերի ու սովորությունների վրա հիմնված մի ամրակուռ հաստատություն է, որն անկարելի է խախտել, կամ մտածել անգամ խախտել: Այդ խախտումը փլուզելու է մի ամբողջ շինություն, որի վրա է բարձրացնում ազգի բարոյականության, նրա պահպանման ու հարատևման հավատամքը: Այդտեղ մենք հանդիպում ենք երկարատև ուսումնասիրված ու մշակված ծեսերի, սովորությունների, որոնք հիմք են դառնում ընտանեկան, հասարակական ու ցեղային ամրության: Մեզ համար առաջին հայացքից ոչինչ ասող սովորությունների մեջ նրանք նաեւ հասարակության հիմքը կազմող ընտանեկան ամրության բարքեր են ամբարել: Այդ անուս ու տգետ մարդիկ հարաբերությունների ինչ նրբությունների մեջ են թափանցել: Ըստ ընդունված ավանդության, ամռան երկարատև օրերին, նորահարսին իր ամուսնուց երկար ժամերով բացակա չպահելու համար, կեսուրը հարսին ուղեկցել է արտ, ամուսնուն կեսօրվա հաց տանելու պատրվակով, «Նոր հարսերուն համար միամիտ ու քաղցրագին բանաստեղծութիւն մըն է աս», որի հիմնական նպատակը եղել է երիտասարդ զույգի զգացումը իրար հանդեպ վառ պահել: Եվ տեսե՛ք շարունակության մեջ որքան նուրբ ընթրում կա. «Ընդհանրապէս կեսուրը միջոցը կը գտնէ նորապսակ զույգը մինակ ձգելու, արտին կամ պարտէզին քիչ մը բաց ինկած մէկ կէտին զբաղում մը ձարելով: Այն ատէն հարսին անուշ տեսիլքը ամուսնոյն կը բաւէ կիսելու օրուան կարօտը: Ու անոնց անկողինները հեռու ընող ցերեկը՝ այսպէս լուսաւորուած՝ աշխատողին համար համով ու տանելի կը դառնայ» (էջ 218):

Եվ որտեղի՞ց նրանց մարդկային հարաբերությունների այսքան նուրբ գիտություն:

Ինչո՞ւ է Օշականը այդքան կարեւորություն տվել բարքերին, դրա վրա կառուցել իր վեպը: «Կյանքը բարքերու հանգույց մըն է», - ասում է նա¹:

Բարքերը գյուղացու կյանքի խարիսխն են եղել, իր քնազդից դուրս նրա կյանքի միակ գիտությունը, որով առաջնորդվել, ապրել ու գոյատևել է, այդ բարքերով է ձեւավորվել ազգը: «Ոչ մէկ գնով Չաքար ոտք մետեց իր նշանածին տունէն ներս: Ու անոնք իրարու չոպան մինչեւ պսակին օրը» (էջ 30):

Ընտանեկան անաղարտությունը մաքուր պահելու այս գիտակցումով է առաջնորդվել գյուղացին: Կամ՝ «Գեղին փեսացուները իրենց նշանածէն կը ծանչնան միայն անոր ծայնը»: Այս մեկ նախադասությամբ արդեն մենք տեղեկանում ենք դարերով արմատացած մեր այն բարքերին, որ նշանված աղջիկն ու տղան ոչ միայն իրար չեն հանդիպել, ինչպես Չաքարի պարագայում է, մին-

1 «Համապատկեր», հ. 10, էջ 196:

չել իսկ բառ չեն փոխանակել, միայն արտերում կամ հարսանեկան, ժողովրդային ուրախության պահերին երգելով են իրենց հավանական զգացումները փոխանցել իրարու: Եվ այս բարքերը խախտողներին առանձնահատուկ պատիժ սահմանել: «Կարելի չէր ծակ-պտուկը տունին մէջ պահել մինչեւ առտու: Պէտք էր աղջիկը փողոց նետել: Վճիռը ուշ կամ կանուխ կը պարտադրէր ինքզինքը: Ծակ-պտուկները չէին ապրեր: Եթէ անոնք չսպաննէին իրենք զիրենք, գեղը իր արհամարհանքին, դանդաղ ու անզգամ ծաղրանքին տակ կը չորցնէր զանոնք» (էջ 59): Ինչպես տեսնում եք, այդ բարքերը իրենց նրբության կողքին, նաեւ աններելի ու դաժան են այն խախտողների պարագային: «Մահը, հիւանդութիւնը, նոյնիսկ նիւթական դժբախտութիւնները կրնան զինաթափ ընել գեղացին, բայց անհկա մեղապարտ կնոջ դատը կը սկսի առնուազն հեգնելով, յետոյ զայն կանցնէ իր երգերուն մէջ: Չի մեռցներ, (աւելի առաջ ատիկա էր գեղին օրէնքը) բայց կարհամարիէ զայն անհուն այն կոշտութեամբ, որ հողէն մթերուած է իր մատներուն, ինչպէս իր շրթներուն, դարաւոր մարզանքով» (էջ 82): Փակագծի մեջ առնվածից տեղեկանում ենք նաեւ, որ ավելի վաղ ժամանակներում բարքերը ավելի խիստ են եղել: Ուրեմն բարքերը միշտ փոփոխության են ենթարկվել նաեւ, որն իր շարունակությունն է գտնում հենց այս վեպում: Թուրք կառավարության կազմավորումը սկսել էր խարխուլ ժողովրդի սահմանած ներքին օրենքները: «Գեղին մեծնալովը, թուրքերուն հետ կապերուն լայննալովը, մեղքերը շատցեր էին: Դիւրին չէր օտարին աղջիկը աստանկ կէսգիշերներուն փողոց նետել փեսաներուն կամ կեսուրներուն «հաճոյքին» համար, ինչպէս վճռած էր երկու տարի առաջ կառավարութիւնը, պատժելով բանտով ու տուգանքով մայր մը ու տղայ մը: Բժիշկները քննեցին աղջիկը եւ մեղաւոր գտան «անձարակ» փեսան» (էջ 63): Ուրեմն այդ բարքերը, որքան էլ ստուգված, ժամանակի առումով անշուշտ, նաեւ սխալներ են ունեցել, սխալ ներգործություններ եւ ժամանակների փոփոխությունը վերանայումի է ենթարկել դրանք: Դա միայն փեսացուների հարցը չէ, դա քարացած մի ամբողջ բարքերի ծշտության լինել-չլինելն է նաեւ: Լեռներում իր կյանքը մաշող Չաքարի համար անվերջ վերլուծման, քննության ենթակա հարց է իր կյանքը հիմնահատակ կործանած ծակպտուկ բառը, բարքերի կողմից պարտադրված: «Ծակ պտուկը» - ո՞վ դրավ այդ պիտակները», - հարցնում է նա ինքն իրեն անվերջ եւ եզրակացնում՝ «ինչ խեղժ է մարդոց խելքը»: Այս մեկ պարզ նախադասությունը ամենաազդեցիկ մեղադրանքն ու ընդվզումն է ընդունված բարքերի դեմ: Դա նշանակում էր, որ արթնանում էր անձի ինքնագիտակցությունը եւ անհատական մտածելակերպը արդեն իրեն զգացնել էր տալիս:

Օշականը այդ փոփոխվող դարի ոգին մեզ փոխանցում է տարբեր խորհուրդներով լեցված: Այդ խորհուրդների մեջ ներփակված է մեր ժողովրդի սրտի զարկը, թրթիռը, կոկորդի ելեւէջները, որով իմաստավորվում եւ հարս-

տանում է նրա դիմագիծը: Դեռ «Մեհյան»-ի էջերից մա կարելություն էր տալիս այդ ամենին: «Մեզի կսպասեն մեր դաշտերում վրայ անտես երազի մը պէս շղարշուած բոլոր այն ամանում եղբրգութիւնները, որոնք մեր գեղջուկներուն շրթունքներէն վար կը վազեն... ու ինչեր կան տակաւին...»: Գիտեր, որ ժողովուրդը իր կյանքն իմաստավորել էր իր հոգուն հարազատ պատմություններով ու երգերով, որոնք իր ապրածով շաղախված հարստություններ են եղել: Եվ Օշականը առանձնահատուկ երկյուղածությամբ է մոտենում ազգային այդ հարստությանը: Նա պատահակամորեն չի օգտագործել Նազիկի մոր գեղեցկության մասին հորինված երգը: Երգը ժողովրդի զգացումների ակունքից բխող հոգեկան ապրում է, եւ երբ մի դեպք երգ է դառնում, ուրեմն ժողովուրդը իր սրտի մեջ է ներառել այն:

«Սիրեն Նազիկ, ընքուընիդ

Օսկի գըրիչէն քաշած» (էջ 38):

Այս երգով է սկսում Օշականը Նազիկի մոր ողբերգական կյանքի պատմությունը, որը թեւեւ արդեն մեռած է վեպի սկզբում, բայց ինչպես ժողովրդի մեջ, այնպես էլ կենդանի է վեպում: Եվ հետաքրքիր կերպով այդ կենդանությունը մա պահում է մինչեւ վերջ եւ այս երգի վերջին տողը փոխելով ավարտում Նազիկի կյանքի նույնքան ողբերգական էջը:

«Սիրեն, Նազիկ, ընքուընիդ

Արուն-արցունքէն քաշած» (էջ 319):

Նույն ներդաշնակությամբ է ներկայացնում նաեւ բարձրի եւ ավանդության մասը կազմող ժողովրդային ծեսերը, որին գյուղացին հավատարիմ մուլեռանդությամբ է հետեւում: Դա եւ ուրախության, եւ մահվան, եւ թաղման ու գերեզմանոցային ծեսերն են, ուր ողջ գյուղն է մասնակից դառնում, այնպես, ինչպես կրոնական տոներին: «Բացառիկ հանդէսներէն մահը ամենէն նուիրականն է ու կը խորտակէ բոլոր քէները»: Այս պերճախոս բացատրությունն ինքնին ամեն ինչ ասում է մահվան հանդեպ ունեցած գյուղացու վերաբերմունքի մասին:

Հաճի Ստեփանի, Հաճի Խաթունի մահվան տեսարանները Օշականը մեզ է հրամցնում իր բոլոր մանրամասներով: Այստեղ չարի ու բարու մարդկային մտածումին գոհացում տվող փոխհարաբերությունն է ամկա: Ըստ ժողովրդի համոզումի չարը պատժվելու է ու գործած մեղքերն էլ բացահայտվելու, քանի որ ոչինչ է գաղտնի մնում կյանքում: «Ու կը հաւատար գիւղացին, թէ հոգէառ Գաբրիէլին ետեւէն ինչ կատաղած սատանաներ ծամբայ ինկած էին թելիկ-թելիկ, մագ-մագ քակելու համար Հաճիին դժբախտ հոգին մեղքին պիղծ ձիւթէն: Ով գիտէ ինչ անյայտ ոճիրներ ու անկարելի խոստովանութիւններ պտի ժայթքէր շրջապատին վրայ» (էջ 151):

1 «Մեհյան», թիվ 3, էջ 40:

Օշականը մեծ վարպետությամբ այդ սովորությունը օգտագործում է կյանքի մեկ այլ հարաբերություն ստեղծելու համար: Նրա մոտ մահը վերջ չէ, այլ պարզ դադար ծակատագրի կողմից սահմանված: Այդ դադարից հետո այն նոր ընթացք է ստանում ապրողների համար: Հոր գերեզմանին սգացող Նազիկի զգայացունց երգի ծայրը դարձնում է ապրելու, մահվան ու նոր կյանք ստեղծելու մեջ ձգվող մի կամուրջ: Այդ վշտալի ծայրը բորբոքում է իր կնոջ գերեզմանին սգացող Կարմիրենց Սահակի հոգում կրկին սիրելու տենչանք: Այդ ծայրով իրար է կապում երկու դժբախտ մարդկանց՝ Նազիկին եւ Սահակին:

Այդ ծայրը նաեւ լեռներից վար է բերում մահվան վճռով դատապարտված ասպատակ Ջաքարին, որը թաքնվելով գերեզմանոցի ցանկապատից դուրս՝ «թաւուտի մը կուշտը, հրացանը ծունկին, կը խմեր անոր ծայրը, ինչպէս մէկը, որ քաղցրութեան լիճի մը մէջ կը սուզուի ու չի կշտամար» (էջ 212):

Գերեզմանից իր երգի մեջ ծակատագրի ողջ դժբախտությունը ներդրած, ուժասպառ վերադարձած Նազիկի համար, Ջաքարի թողած հիշողությունը, մեկ ամգամ եւս նրան ունենալու կարոտը, դառնում են ամենօրյա տենչանք ու միեւնոյն ժամանակ իր անտանելի կյանքի միակ սփոփանքը: «Անոր գիրկին, բազուկներուն բոլոր ապահովութիւնը կը տիրեր իր մէջը: Ու անոր հետն էր ան, օրուան բոլոր պահերուն, երբեմն լացին ու գործին իսկ մէջը: Ու կը սիրեր զայն, բառին հագցնելով մեր գիտցածէն տարբեր տարողութիւն» (էջ 209): Նազիկի այս ապրումների կողքին հայտնվում է մի կողմից Նազիկին տենչացող, մյուս կողմից՝ իր այդ զգացման համար մեռած կնոջ հանդեպ դառնորեն մեղանշող Սահակի ապրումները: «Ու անիկա մտքովը կը մերկացներ լացող աղջիկը ու կիյնար անոր ծոցը ու կը հեծկտար, երակները ծամելով: Ու զարհուրած իր սրբապղծութենէն անիկա գրեթէ կը վազեր վեր, դէպի հողքը իր կնիկին» (էջ 207): Սահակի այս ինքնաբազկտիչ ապրումների կողքին գալիս է Ջաքարը, իր հաստատուն, ժայռի պես ամուր, ժայռը փշրող զգացումներով հանդեպ Նազիկը: Այս երեք կերպարների ապրումներով երեք տարբեր մարդկային աշխարհներ է բացում հեղինակը եւ միայն այդքանով չի բավարարվում: Հանկարծ նույն իր գրչի զորությամբ նա փոխում է վեպի ընթացքը: Հաճի Խաթունի խորամանկ նախաձեռնությամբ Նազիկին ամուսնացնում են Կարմիրենց Սահակի հետ: Բարքերի, ավանդույթների խստապահանջ հետետրոյ ժողովուրդը տեղի է տալիս: Ծակ-պտուկ Նազիկը ոչ թե քարկոծվում, արիամարիվում, ինքնասպանության է դիմում, ինչպես ընդունված էր, այլ հակառակը՝ նոր կյանք է սկսում: Դեպքերի այս շրջադարձում ավելի է հաստատվում հեղինակի վեպը տիրապետելու կարողությունը: Նա նույն համահնչունության մեջ է շարունակում դեպքերի նոր ընթացքի զարգացումը: Գործողությունների շարժումը իրար շաղկապելու հետաքրքիր եղանակով կարծես սկսում է մի նոր էջ վեպի հերոսների կյանքում, որը կրկին զարգացման բարձրակետին

է հասցնում: Այստեղ իրապես շեշտվում է ոչ միայն կյանքը գրականություն փոխադրելու իր հավատամքը, այլ կյանքը բազմազան ապրումներով ու իմաստով վեպը բացելու նրա ապշեցուցիչ կարողությունը:

Գյուղում կիրքը բոլորովին այլ բնույթ ունի, քան քաղաքում: «Քաղաքներու մէջ սեռային յիմարութիւնը դիւրաւ կը ծարէ համոզիչ պիտակներ»: Այս «համոզիչ պիտակներու» բացակայությունը գյուղի կիրքը դարձնում է բարոյականության խստագույն միջոց, զուրկ արդարացուցիչ հանգամանքներից: Ինչպես կյանքում, այնպես էլ նրա գործերում կիրքը միանշանակ չէ, միայն սեռային, անկողնային, հաճույք չէ: Կրքի խանդով բռնկված նրա կերպարները հաճախ մարդասպան են դառնում, ինչպես Հաճի Ստեփանը, հաճախ իրենց անտանելի կյանքը կրքի հեռավոր ձգտումով լեցնելով տանելի դարձնում՝ Նազիկի պարագային, երբեմն խորտակված հոգու վերագաղթնում է դառնում՝ Կարմիրենց Սահակի պարագային, հաճախ այն մղում է սխրագործություններին՝ Զաքարի դեպքում, հաճախ էլ այն դառնում է առաջնահերթ հաճույք ու կործանում տվյալ անձին՝ Հաճի Մուրատի պարագային: Գյուղացու կյանքը հիմնված է կիրքը ոչ թե որպես ֆիզիկական վայելք ընդունելու, այլ որպես սերունդ բազմացնելու գիտակցության, բարքերի վրա: Սերունդի, ցեղի շարունակության վրա է դրված կին եւ տղամարդ սեռային փոխհարաբերությունը այդ ժամանակաշրջանում: Ահա թե ինչու վիպասանը կյանքի բուն արգանդը գյուղն է համարում, ուր դեռ ամարատ են պահվում ոչ միայն ավանդույթները, այլ նաեւ սեռային հարաբերությունները: Եվ այդ վիճակից դուրս եկողները անմիջապես նկատելի են ու պատժի արժանի: «Գեղը կը ծանցնայ, անանուն, բայց հանրածանօթ զգայարանքով մը, իրենց հոտէն, այտի միսերուն պառկուածքէն ու ռունգերուն ծիրէն այդ կնիկները, որոնք իրենց ծոցը ինկող արուները կը ծծեն անդով շաղապատումով ու կը սպառեն զանոնք» (էջ 225):

Վեպի ընդգծված առանձնահատկությունն է անհատի կրքի, սեռային խիզախումը, որն առկա է Օշականի բոլոր գործերում:

Գյուղի համար այս որակավորմանն է պատկանում Նազիկը, որին բնությունն օժտել է հախտուն կրքով, որի աստիճանական զարգացումը մեր առջեւ բացում է վիպասանը կնոջը բոլոր զգայարաններին գիտակ մարդու հիացումի արժանի նրբությամբ: Օշականի մոտ թաքուներ չկան: Նա մեծ գեղագետի վարպետությամբ ներկայացնում է անկողնային, սեռային հարաբերությունները: Առանց կաշկանդումների նկարագրում է դեռ միամիտ, առանց կրքի, կարեկցանքից դրդված Նազիկի տրվելը Թումասիկին:

Ո՛վ է կինը այդ հասարակարգում, ի՞նչ իրավունքների տեր: Այս հարցադրումն է իր վեպի խորքում:

Ընդունված սովորության համաձայն, առանց հարցնելու Նազիկին ամուսնացնում են: Մայր դառնալու անձանոթ ապրումների մեջ դեռ նոր ոտք դրած,

պարտադրաբար վիժեցնում, ստիպողաբար ամուսնացնում են երկրորդ անգամ, գյուղի առաջ ծնծում, խայտառակում: Սա է հիմնականում կնոջ վիժակը այդ օրերին: Եվ Օշականը բուրոսովին մոր իմաստ ու դեր տվեց կնոջը իր վեպերում: Այդ դերը ոչ թե միայն մակերես է, այլ խորք, մարդկային ապրումների շերտեր, որոնցով լեցուն է կինը: Կնոջ ներքին զգայարանները ծանաչելու նրա կարողությունը հասնում է զարմանքի: Այնպիսի մուր շերտեր է բացում կնոջ զգացումների մեջ, այնպիսի գույներով հրամցնում, որ կին լինելով մնում են ապշած, թե ինչպե՞ս է նա տեսել ու զգացել այդ ամենը կնոջ մեջ:

Վեպում բարձրագույն վարպետությամբ նա բացում է Նազիկի ներաշխարհի յուրաքանչյուր ծալք՝ տառապանքի, ցավի, խելակորույս սիրո, նույնքան խելակորույս կրքի, տարփանքի, ըմբոստության: Արհամարհելով ամեն վտանգ, հիվանդ ամուսնուց, նրա մորից, իր մեծ մորից թաքուն նա ընդունում է Չաքարին, իր մեջ կուտակված կարոտով կենակցում նրա հետ, որն ամբողջովին ինքնամոռաց սեր է ու մկիրում: Նրանց գաղտնի հանդիպման, իրար տրվելու պահը դատապարտման զգացում չի արթնացնում: Մոռանում են անգամ ընտանեկան բարոյական օրենքների ոտնակոխումը: Մաքուր սեր ու մերժեցում են տեսնում եւ տանջվում են նրանց բաժին ընկած անողորմ ձակատագրի համար:

Մյուս կողմից Նազիկի եւ Սահակի անկողնային հարաբերության մեջ նվաղած Սահակի անկարողությունը Նազիկի ծով կրքի հանդեպ մարդկային ցավ ու կարեկցանք է հարուցում: Սակայն սխալ կլինի այն բնորոշումը, որ Նազիկը միայն կրքի կապանքների դեմ է պայքարում: Նա ոչ միայն իր զգացումների, այլ նաեւ իր մարդկային իրավունքների պահանջատերն է: Նրա ամուր պահվածքը Չաքարի առջեւ հարսանեկան չարաբաստիկ գիշերը, Չաքարի «Ո՛վ էր» հարցին համառորեն չպատասխանելը, Չաքարի հետ տեսակցելու նրա որոշումը, այս ամենի մեջ ի հայտ է գալիս իր ձակատագրի տեր կինը: Ինքն է ուզում տնօրինել մինչեւ իսկ իր խաթարված կյանքը, առանց որեւէ մեկի միջամտության, առանց ուրիշի կողմից դրված արգելքների:

Ամբողջ վեպի ընթացքում Նազիկը միայն մեկ-երկու փոքրիկ նախադասություններ է ասում: Այնքան կարճ են այդ նախադասությունները, որ մենք նույնիսկ իր ծայրը չենք կարողանում որոշել: Բայց վեպի վերջում բացվում է տառապած, մինչեւ հոգու խորքը շրջապատի անարգանքից պատառոտված կնոջ ներաշխարհը: «Ալ չեմ երթար: Ալ կօգտէ քաշածս: Մեռնիլ է նէ, մեռնիլ, ալ չեմ դիմանար» (էջ 295): Սա բողոք չէ, այլ տանջված հոգու ժիչ: Չայրույթ բարքերի, սովորույթների դեմ, որոնք իր դժբախտության հիմքը դարձան: Իր կյանքին տեր կանգնող մարդու հասունացմամբ է նա որոշում իր ձակատագիրը՝ մահը, որը ազատելու է իրեն տառապանքներից: Հնի եւ մորի բախումներում միշտ էլ զոհեր են լինում եւ այդ զոհերն են դառնում մորը ստեղծողները:

Թեև չկան արդեն այդ հին բարքերը, բայց Օշականի վեպերում կենդանի են նրանց զոհերը՝ Նազիկները, Չաքարները, Սողոմները, Աղվորները:

Ընդհանրապես Օշականի ստեղծած կանացի կերպարները իրենց բազմազանության մեջ ամուր են, հաստատուն բնավորությամբ, ինքնատիպ: Հաճի խաթունը իր իշխող, կյանքի ապրած դասերով կոփված, բարքերին գերի ու դաժան այն խախտողների, մինչև իսկ իր թոռան հանդեպ: Նրան հակադիր Սահակենց հարսը, նուրբ, զգայուն, իր որդու կորստով աշխարհից քաշված, բայց ուրիշների ցավը հասկացող: Դայակ Մելեքը, որի անունը թուրքերենից առնված հրեշտակն է, բայց ոչ մեկ հրեշտակային նկարագիր ունի: Կյանքի դժվարության մեջ կոփված, իր գոյության համար ամեն ինչի դիմող, գործնական ու արի կին: Սահակի մայրը, աստվածավախ, բարքերին հլու, անապրկեշտության դեմ անգիշող ու իր միակ արու զավակի համար իր կյանքը մաշող: Չաքարի մայրը՝ Մարիամը, նույնպես աստվածավախ, բարքերին գերի ու այն խախտողների դեմ անաչառ կին: Հայրապենց հարսերը, այս վերջինները թեև առանձին չեն ներկայացված, բայց նույնքան տեսանելի են որպես կերպարներ, գործնական, գյուղում իրենց դիրքը օգտագործող, դաժան ուրիշների սխալների ու անողոք ուրիշների դատը տեսնելիս: Ոչ միայն Նազիկի, այլ Դայակ Մելեքին իրենց ոտքի հարվածներով սպանելը եւ անտարբեր հեռանալը մեռնող կնոջ մոտից ամենախոսուն վկայությունն է իրենց անմարդկային նկարագրի: Եվ այս բոլորի կողքին հակադրաբար նա կերտում է Նազիկի կերպարը, հավաքական ընթոստության, դարեր բանտված կաշկանդումներից ազատագրվել ցանկացող, միեւնույն ժամանակ նուրբ ու բարի, կանացի շենշող հմայքով լեցուն:

Օշականը գիտե նաեւ դեպքերին ավելի մեծ ընթացք տալ, լայնացնել ընթերցողի երեւակայությունն ու վերլուծելու կարողությունը: «Շատ բան մեր մէջ պատահել է ետքն է, որ մատչելի կըլլայ մեր դատումին» (էջ 213), - ասում է նա: Դրանք կյանքի այն անբացատրելի խորհուրդներն են, որոնք պատահում են ինչ-որ բան հուշելու մեզ, սակայն ցավոք որքան էլ վաղ են հայտնվում, միեւնույն է, դրանք ուշադրության են արժանանում միայն դեպքը պատահելուց հետո: Այդ պատահար խորհուրդներն է սիրում վերլուծել գյուղացին, դրանցով գտնել ճշմարտության թելը: Գրականության մեջ ձակատագրապաշտություն անունն է կրում դա եւ Օշականը կյանքում ձակատագրապաշտ լինելով դրաներգործությունը հասկացող մարդու խորությամբ նույնը փոխադրել է իր գրականության մեջ: Վեպի սկզբում, Նազիկի եւ Թումասիկի առաջին հանդիպման ժամանակ, առավոտյան հնչող մեռելի զանգակը, թաղում են մի նորահարսի, սահմկեցուցիչ, բայց անցողակի է ներկայացվում: Երկու անմեղ պատանիների առաջին մերձեցումը, բախվում, հակադրվում է մահվան հետ, բայց միաժամանակ հուշում է նրանց համար նույնքան տխուր վերջաբան: Եվ այդպես

էլ պատահում է՝ շուտով մեռնում է Թումասիկը: Կամ Նազիկի երազը մահից առաջ, որը նույնությամբ իրականանում է: Սրանք կյանքի անբացատրելի կապերն են լինելիքի եւ տեսլականի միջեւ, որը հեղինակը մեզ է մատուցում բարձրագույն արվեստով: Այս պատկերներով, խորհուրդներով լեցուն այլաբանություններով է Օշականը կերտել իր «Ծակ Պտուկը» վեպը, անմահացնելով Նիկիո լճի շրջանում ապրող հայի կյանքն ու նրա դիմագիծը, գրականության մեջ դրոշմելով ապրված ու անհետացած սերունդի մի ամբողջ կյանք բարձրագույն արվեստով ու ինքնատիպ գույներով: